

**Nannunik illersuineq piniarnerlu pillugit  
Namminersornerullutik Oqartussat nalunaarutaannut  
nr. 21, 22. september 2005-imeersumut**

**ilitsersuut**



Foto: J. Thomassen (Norsk Inst. f. Naturforskning)

**Ilitsersuummut tunuliaqut:**

Ilitsersuut suliarineqarpoq kommunit aammalu nalunaarummik pineqartumik atuisartussanut allanut tapertarineqarsinnaasussanngorlugu. Nannut pillugit nakkutilliinermut atatillugu nalunaarut malillugu maleruagassat arlallit sukannernerulersinneqarput, taamatullu nalunaarummik atuisartussat allaffissornikkullu ingerlataqartussat eqqarsaatigalugit naleqquttuusorineqarluni ilitsersuusiortoqarnissaa. Ilitsersuut nalunaarutip piareersaarsiorneqarnerani suliaasimasut ilaattut isigineqassaaq, taamatullu aalajangersakkat imarisaat pillugit ilisimatitsissutitut, soorluttaaq pineqartut qanoq paa-sineqarnissaannut iluaqutaasinnaasussatut isigineqassasoq. Ilitsersuut imarisamigut inatsisitigut aalajangiussinissamut pituttorfiunngilaq. Ilitsersuummi ”Pisortaqaarfik” taaneqartillugu, tamatumani pineqartarpoq Aalisarnermut Piniarnermullu Pisortaqaarfik, ”Naalakkersuisunullu ilaasortaq” taaneqartillugu pineqartarluni Aalisarnermut Piniarnermullu Naalakkersuisoq.

## Imai

Ilitsersuummut tunuliaqut .....	1
Imai .....	2
§ 1.....	3
§ 2.....	3
§ 3.....	4
§ 4.....	5
§ 5.....	5
§ 6.....	6
§ 7.....	7
§ 8.....	7
§ 9.....	7
§ 10.....	9
§ 11.....	9
§ 12.....	10
§ 13.....	10
§ 14.....	11
§ 15.....	11
§ 16.....	12
§ 17.....	12
§ 18.....	12
Kommunit suliaasaannut ilitsersuutinnuaq .....	13
Pisaqarsimanermik immikkut nalunaarfissaq .....	15

## § 1

### *Imm. 1:*

Nalunaarut nunami aalisarnikkullu imartami Nunatta oqartussaaffigisaani atuuppoq. Nalunaarummi pineqarput nannut illersugaanerit piniarneqartarnerallu, taamaasillunilu aamma eqqissimatitsinisaq pillugu aalajangersakkanik aammalu nannut piniarneqartarnerat pillugu aalajangersakkanik imaqarluni.

### *Imm. 2:*

Nuna Allannugtsaaliugassatut Immikkoortitaq pillugu nalunaaruteqareerpoq (Kalaallit Nunaata avannaarsuani kangianilu Nuna Allannugtsaaliugassatut Immikkoortitaq pillugu nalunaarut nr. 7, 17. juni 1992-imeersoq) taamatullu aamma Qimusseriarsuarmi Uumasunik Eqqissimatitsivik pillugu nalunaarut (Qimusseriarsuarmi uumasunik eqqissimatitsivik pillugu nalunaarut nr. 21, 17. maj 1989-imeersoq). Nalunaarullu matumani pineqartoq nalunaarutitut matuma siuliani taaneqartunut arlariinnut naligiissineqarpoq. Taaneqartut saniatigut kommunini ileqqoreqqusat aqutugalugit allatigut aalajangersagaliortoqarsimasinnaavoq, taamatut ileqqoreqqusaliorsinnaanissamut inatsisitigut § 13 malillugu periarfissiissut naapertorlugu.

## § 2

### *Imm. 1:*

Tunngaviusumik aallaavigineqartoq tassaavoq nannut eqqissimatitaammata, taamaattorli pisassiisutigineqartut iluanni aammalu piffiup piniarfioqqusaasup iluani nannunniartoqarsinnaasoq, tak. § 3. Pisassiisutigineqartut pisarineqareeraangata allatigut nannunniartoqaqqusaanngilaq, taamatullu pisoqaraluarpat § 4, imm. 3 malillugu periarfissaqartoqarpoq Naalackersuisunut ilaasortap kommunimut pineqartumut ukiumi pineqartumi ukiumiluunniit pisassiivimmi tullermi pisassiisutunik ikilitsisinnaanissaanik.

### *Imm. 2 aamma 3:*

”Nanuaqqat” taaneqaraangata pineqartarput nanuaqqat arnaminnik pinngitsuuisinnaanngitsut. Taakku ukiunik marlunnik ukiulluunniit pingajuat avillugu tikillugit utoqqaassuseqarajuttarput. Tamatuma kingorna arnavissat nulioqqinnialersarput, taamaalineralu „piaqqat“ anaanartik qimakka-juttarlugu. Eqqissimatitaalluinnartut tassaapput arnavissat piaqqisartut aammalu nanuaqqatut uani taasat. (Aalajangersakkat malittaraat nunat tamalaat akornanni Oslomi isumaqatigiisummut atatil-lugu IUCN-ip ataani appendix 2, Annex E, PBGS-imi (Polar Bear Specialist Group) 1997-imi ataatsimiinnermi isumaqatigiisut).

### *Imm. 4:*

Nannut apissiminniittut apissikkallarsimasulluunniit akornusersoqqusaanngillat. ”Akornusersuiner-tut” isigineqassapput apissiinik assaanerit, inuit apisseqarfiusut qanittuini angallannerat, qimminit uumasunilluunniit allanit akornusersuinerit allatigulluunniit iliuuserisat nannut apissiminniitillugit ajoqusersuutaasutut nalilernerqarsinnaasut. Nanoq ilumittoq apissiminiilersarpoq septembarimi-oktobarimi apissiminiikkunnaartarlunilu marsimi-apriilimi. Taamaattumik nannunik piffimmi tas-sani akornusersuinissaq nannup inuunerata ingerlanerani annertuumik akornusiisinnaavoq, katatsi-sinnaanissaalu ilumiataluunniit allatigut ajoqusersinnaanissaa aarleqqutigineqarsinnaalissammat. Tamakku saniatigut nannut orsoqarluatigisassaminnik atuipilutsinneqarsinnaapput, taakkuullutillu nanuaqqat arnaasa ilaatigullumi aamma namminneq uumaniassutissaraluarat taakkunani qaammatini 6-7-nni apissimiinnissaraluuminni, tamatumani arnaat akornusersorneqarnertik pissutigalugu apis-siffissaminnik allamik ujaasisariaqalersimassagalarpata.

### § 3

Nannunik pisassiissuteqartalernissaq Naalakkersuisunit aalajangiunneqarpoq 2000-imi. Taamatut aalajangernermit ilaatigut tunngaviupput nannunniartarnerup piujuaannartitsinissaq tunngavigalugu ingerlanneqartarnissaanik mianerisassat taamatullu nannut ikiliartunnginnissaasa qulakkeerneqar-sinnaanissaannut atatillugu iliuuseqarnissaq.

#### *Imm. 1:*

Naalakkersuisut pisassiissutinik aalajangersaasarput, soorluttaaq qilalukkanik qernertanik qaqorta-nillu pisassiissutinik aalajangersaasarnermittut. Pisassiissutigineqartussat amerlassusissaat pillugu aalajangiiniarnermi mianerisassat tassaasarput nunat tamalaat akornanni pineqartut pillugit qaqu-gukkulluunniit isumaqatigiissutaasimasut, uumassusilinnik misissuisut (biologit) siunnersuinerat aammalu atuisut ilisimasaat. „Atuisut ilisimasaat“-nik taasaq atituumik paasineqartariaqarpoq ilaa-tigullu pineqarlutik innuttaasunit paasissutissarsiaasartut. Pisassiissutigineqartussat aalajangiunne-qartinnagit pineqartut Piniarneq pillugu Siunnersuisoqatigiinnut tusarniaassutigineqaqqaartassapput. Aalajangersakkami tassani malinneqarpoq Inatsisartut piniarneq aallaaniarnerlu pillugit inatsisaanni nr. 12, 29. oktober 1999-imeersumi § 2-mi imm. 3 aamma 4, taakkunani aalajangersarneqarmat piniarnermik aallaaniarnermillu aqutsinermut tunngassuteqartut pineqartillugit piniartut atuisullu ilisimasaat pingaartinneqartassasut, ilaatigut pineqartut qitiusumik kattuffigisaat aammalu Piniarneq pillugu Siunnersuisoqatigiit aqputigalugit, taamatullu aamma aalajangersagaqarluni Naalakkersuisut piniartut atuisullu ilisimasaat aqutsinermut pineqartumut atatillugu ilanngussaqartarnissaq pillugu erseqqinnerusunik aalajangersagaliorsinnaasut.

#### *Imm. 2:*

Naalakkersuisut akiliisitsilluni nannunniarsinnaatitaanermik akuersissuteqarsinnaatitaapput. Naa-lakkersuisooqatiginnermi isumaqatigiissummut ilassutitut isumaqatigiissummi 12. januar 2005-imeersumi anguniagassatut taaneqarpoq piniarneq pillugu nutaanik maleruagassiortoqarnissaanut atatillugu tammajuitsussarsiorluni piniarsinnaasoqalernissaa ilanngunneqassasoq, tamannalu piuju-artitsinermik tunngavilimmik aaqquissunneqassasoq. Akiliisitsilluni piniartitsisinnaaneq pillugu maleruagassat immikkut nalunaarusiornikkut aalajangersarneqassapput.

#### *Imm. 3:*

Pisassiissutit arnaviaanerat, angutiviaanerat, aamma qanoq utoqqaassuseqarnerat tunngavigalugit aalajangersimasunut killilerneqarsinnaapput pisassiissutinulluunniit ikinnerusunut agguataarneqar-sinnaallutik. Killiliisoqarsinnaavoq imaalillugu arnaviaannaat imaluunniit angutiviaannaat arlaat aalajangersimasumik utoqqaassusillit kisimik piniarneqarsinnaanngorlugit aammalu/imaluunniit pisassiissutinut ikinnerusunut agguataarlugit. Piffik piniarfiusinnaasoq imm. 4-mi takuneqarsinnaa-voq.

#### *Imm. 4:*

Piffik piniarfiusinnaasoq pineqarpoq. Tunumut (Illoqqortoormiut aamma Ammassallip kommunii) atatillugu piniarnissamut immikkut piffissaliisoqarpoq.

#### *Imm. 5:*

Pisassiissutit tusagassiorfinnut nalunaarutikkut Namminersornerullutik Oqartussallu internettimi nittartagaatigut tamanut nalunaarutigineqartarput ([www.nanoq.gl](http://www.nanoq.gl)).

#### *Imm. 6.:*

Ukioq pisassiiviusoq siulleq aalajangiunneqarpoq tamatumani nalunaarutip atuutilerneraniit piffis-saqartoqartariaqarmat ukiumi siullermi pisassiissutaasussat amerlassilernissaannut atatillugu paasis-sutissat pisariaqartinneqartut pissarsiarineqarnissaat.

## § 4

### *Imm. 1:*

Piniarneq pillugu Siunnersuisoqatigiit pisassiissutissat pillugit aalajangersaanissamut atatillugu tusarniaaffigineqartussaapput, Inatsisartut piniarneq aallaaniarnerlu pillugit inatsisaata allanngortinneqarneranik Inatsisartut inatsisaanni nr. 9, 15. april 2003-meersumi § 16 naapertorlugu. Naalakkersuisut pisassiissutigineqartussat aalajangiussaakommunikkaartumik agguataarneqarnissaat Naalakkersuisunut ilaasortamit aalajangersarneqartarpoq KNAPK-p aamma KANUKOKA-p tusarniaavigineqareernerisigut. Nannut sinerissami qanoq agguataarsimanerat pillugu erseqqissumik amerlassusiliisinnaaneq ajornartorsiutaammat nannullu sinerissami sumiiffinnut allanut nuulertorsinnaasarmata kommunikkaartumik agguataarisarnissamit allaanerusumik allaffissornikkut agguataarisinnaaneq ajornartorsiorfiulersinnaavoq. Taamaattumik pisassiissutit sumiiffinni pineqartuni nanoqatigiit tunngaviginagit kommunikkaartumik agguataarneqartarput.

### *Imm. 2:*

Kommunalbestyrelsi kommunimut pineqartumut pisassiissutinut atatillugu allaffissornikkut aqutsinermik isumaginnittussanngortinneqarsinnaavoq. Allaffissornikkut aqutsinerup ilai kommuninit isumagineqartussat suuneri §§ 6, 7, 10, imm. 1-imi, § 11, imm. 1, 2 aamma 5-imi kiisalu aamma atorneqarsinnaasut § 13-imi takuneqarsinnaapput.

### *Imm. 3:*

Pisassiissutissiinermi aamma tunngavissaritinneqarsinnaavoq kommunimi pineqartumi ukiup siuliani pisassiissuteqarfiusumi unioqqutitsilluni nannunniartoqarsimanersoq, taamatullu tamanna tunngavigalugu pisassiissutissanik ikililerisoqarsinnaalluni. Tamatuma saniatigut pisassiissutit ukiumi pineqartumi ikililerneqartarsinnaapput. Tamatumani siunertarineqartoq tassaavoq kommunit aamma piniartut kajumissaarneqarmata unioqqutitsilluni piniartoqannginnissaa nakkutiginiaqqullugu - taamatullumi aamma pisassiissutigineqartunik qaangiisoqartannginnissaa aamma eqqarsaatigalugu, tamanna unioqqutitsilluni nannunniarsimanertut aamma isigineqassammat. Naalakkersuisunut ilaasortap aalajangiiniarnerminut atatillugu aamma tunngaviginiarsinnaavaa unioqqutitsilluni nannusimaneq(-nerit) politiinut nalunaarutigineqarsimanersoq(-sut) aammalu unioqqutitsineq qanoq pisi-manersoq.

## § 5:

### *Imm. 1:*

Aalajangersagaq ilanngunneqarpoq akuersissummik tunineqaqqaarsimanissamik piumasagaat erseqqissarumallugu, taamaasilluni pisassiissutaasunit pisarineqartartut sukumiisumik malinnaaffigineqarsinnaaqqullugit. Aalajangersagaq aamma taannaavoq tuttuq umimmaallu pillugit nalunaarutini atuutsinneqartoq. Akuersissut ilanngullugu inuussutissarsiutigalugu piniarsinnaatitaanermik uppernarsaat nannunniarnerup nalaani nassarneqartartussaassapput, ilaatigut tak. Piniarnermik aalisarnermillu nakkutilliisut pisinnaatitaammata piumasarisinnaallugu inuk Inatsisartut piniarneq aallaaniarnerlu pillugit inatsisaat nr. 12, 29. oktober 1999-imeersoq malillugu piniarsinnaatitaanersoq paasiumallugu kinaassutsimut uppernarsaammik takutitseqqullugu. Akiliisitsilluni piniartitsisinnaaneq pillugu maleruagassat immikkut nalunaarusiornikkut aalajangersarneqassapput.

### *Imm. 2:*

Aalajangersagaq marluinnut avinneqarnikuuvoq. Nannuttoqaqqusaanngilaq 1) akiliisinneqarsimasunik ingiallorteqaraanni imaluunniit 2) akuersissummik peqartoq inuussutissarsiutigalugu piniarsinnaatitaanermut allagartaqanngitsunit angallanneqarpat. Marluinnit pineqartunit siulleq ilanngunneqarpoq ilaatigut pinngitsoortikkumallugu takornariat akiliillutik angallanneqartut takornarianik angallassisartunit/outfitterinit taamatut suliaqarnissaminnut akuersissuteqanngitsunit angallanneqarnermikkut navianartorsiorinneqartarsinnaanerit. Aappaa ilanngunneqarpoq akuersissummik peqar-

toq nannunniarnerup nalaani nammineq angallatissaqartinnagu inuussutissarsiutigalugu piniarsinnaatitaanermik uppersaataillit kisimik angallallugulu assartuusseqatigisinnaassammassuk. Kommunit akuersissutinik agguassinermini pineqartumut atatillugu suut tunngavissaasariaqarnissaat namminneq aalajangersarsinnaavaat.

## § 6:

### *Imm. 1:*

Qinnuteqartoq akuersissummik pissarsiniassaguni

- 1) piffiup qinnuteqarfiusup nalaani inuussutissarsiutigalugu piniarsinnaatitaanermut uppersaammik atuuttumik peqartariaqarpoq. Tamanna Inatsisartut piniarneq aallaaniarnerlu pillugit inatsisaanni § 4, imm. 2-mi aamma Namminersornerullutik Oqartussat piniarnermut allagartat pillugit nalunaarutaanni nr. 20, 27. november 2003-meersumi aalajangersagaavoq, inuussutissarsiutigalugu piniarsinnaatitaanermut uppersaammik qinnuteqartunut suut pi-  
umasaqaataasarnerat pineqartillugit.
- 2) Taamatuttaaq kommunimi akuersissummik qinnuteqarfiusumi inuit allattorsimaffianni nalunaarsorsimasuusariaqarpoq.

”Akuersissut” matumani ima paasineqassaaq Inatsisartut piniarneq aallaaniarnerlu pillugit inatsisaanni nr. 12, 29. oktober 1999-imeersumi § 3, imm. 2-mi aalajangersakkamut naapertuuttut, tassani ”akuersissut” nassuiaaserneqarmat tassaasoq ”...uumasumik aalajangersimasumik piniarnarsinnaatitaaneq Naalakkersuisunit inummut angallammulluuniit akuersissutigineqartoq.”

### *Imm. 2:*

Akuersissutinik tunniunneqartunit amerlanerusunik qinnuteqartoqarsimappat kommunip nammineerluni aalajangigassaraa akuersissutit suut tunngavigalugit agguataarniarnerlugit. Pisorta qarfiup pingaartippaa, najukkani pineqartuni mianerisariaqakkat eqqarsaatigalugit, assersuutigalugu piniartut akornanni ileqquliussaareersut eqqarsaatigalugit, atugaareersut akuersissutinik agguaanermut atatillugu ilanngullugit tunngaviginiarneqartarnissaat, tamannaavorlumi suliassamik pineqartumik kommuninut tunniussinermut tunngaviusoq. Imatullumi agguataarisooqarsinnaavoq tullerriaarineq malillugu agguassisarninngorlugu, tamatumani ukiup siuliani pisaasimasut aammalu akuersissutit atorneqarsimanngitsut naatsorsuutigisarlugit. Agguataarineq aamma allattuiffinni inissisimaneq malillugu ingerlanneqarsinnaavoq, qinnuteqaaqqaartut akuersissummik pissarseqqaartussanngorlugit, imaluunniit nannunniartartutoqqanut imaluunniit qinnuteqartunut tamanut akuersissusiinikkut (tamatumani kommunip akisussaaffigissavaa nannunniarneq unitsinneqassamat pisassiissutit tamakkerneqarpata). Kommunip § 5, imm. 2-mi piumasqaatit aalajangersagaq maluginiartariaqarppaa, taanna malillugu akuersissummik piginnittoq nannuttarisaminik inunnit inuussutissarsiutigalugu piniarsinnaatitaanermik uppersaatailinnit taamaallaat angallanneqarlunilu assartuusseqateqarsinnaammatt imaluunniit nammineq angallatiminik angalasuussammatt. Kommunip akuersissutinik tunniussisarnermini naligiimmillu sullissisusaatitaanermi tunngavissiiniarnerminut atatillugu alaatsinaanniagassai tassaapput ingerlatsiviup inatsisinut attuumassutai aqutsinermini piviusorsiorlumik tunngavigisussaagamigit.

### *Imm. 3:*

Akuersissummik tunniussinermi ilutigalugu tunniunneqassaaq nalunaarusiorfissiaq.

### *Imm. 4:*

Pisassiissutigineqartut qaqugukkut tamakkerneqarnissaat pillugu isumannaatumik nakkutilliisimannisaq kommunip akisussaaffigaa. Pisassiissutigineqartut qaangerneqarpata tamanna ukiup tullissaani pisassiissutissat agguataarnissaannut sunniuteqarsinnaavoq, tak. § 4, imm. 3.

*Imm. 5:*

Kommunimut pineqartumut pisassiissutit tamakkerneqareerpata tamanna Pisorta qarfirmut allakkatigut nalunaarutigineqassaaq, pisassiissutinit qassit pisarineqareersimanerat Pisorta qarfiup nuna tamakkerlugu ingerlaavartumik malinnaaffigisinnaaniassammagu.

## § 7

*Imm. 1:*

Akuersissutit tunniunneqartut aaneqareersimanissaannut piffissaliussassaaq kommunip aalajangissavaa, ima periarfissaqartitsisinnaassalluni akuersissutit pineqartunit aaneqanngitsut qinnuteqaraluartunut allanut agguaanneqarsinnaasussangorlugit, tak. imm. 2. Akuersissutit atorneqanngitsut kommunimut piaarnerpaamik utertinneqassapput, taakku ukiup pisassiissuteqarfiusup iluani nutaamik agguaassinissamut atorneqarsinnaaqullugit.

*Imm. 2:*

Akuersissutit aaneqanngitsoortut qinnuteqarsimasut akornanni agguaateqqinneqarsinnaapput. Kommunip aalajangissavaa agguaasseqqinnissaaq qanoq aaqqissuunneqassanersoq, taamatullu qaqugukkut pinissaanik piffissaliussissalluni piffik nannunniarfiulersussaaq sioqullugu.

## § 8

*Imm. 1:*

Piniartoq nannunniarnerup nalaani akuersissumik pineqartumik atuuttumik aamma inuussutissarsitigalugu piniarsinnaatitaanermut uppersaammik nassataqassaaq. Akuersissut aamma inuussutissarsitigalugu piniarsinnaatitaanermut uppersaat nannunniarnerup nalaani nassarneqartariaqartussaavoq, tak. Inatsisartut piniarneq aallaaniarnerlu pillugit inatsisaat nr. 12, 29. oktober 1999-imeersoq, taanna malillugu Piniarnermik aalisarnermillu nakkutilliisut pisinnaatitaammata piumasarinnaallugu inuk piniarsinnaatitaanersoq paasiumallugu kinaassutsimut uppersaammik takutitseqqullugu. Piniartoq pineqartoq inuussutissarsitigalugu piniarsinnaatitaanermut uppersaammik atuuttumik pigisaqarunnaarsimappat akuersissut atorneqanngitsoortoq kommunimi pineqartumi akuersissummik tunniussiviusumi kommunip allaffianut tunniunneqassaaq.

Akuersissut inummut namminerluinnaq atuuppoq allanullu tunniunneqassanani tunineqassanilu. Aalajangersagaq aamma taannaavoq Namminersornerullutik Oqartussat tutut piniagaanerat pillugu nalunaarutaanni nr. 6, 8. februar 2001-imeersumi § 6, imm. 2-mi aalajangersakkami atuutsinneqartoq.

*Imm. 2:*

Akuersissut ataaseq nannumik ataaseraarsinnaatitaassutaavoq. Akuersissut ukiumi akuersissummik tunniussiviusumi atorneqartussaavoq. Akuersissut taamaasilluni ”toqqorneqaannarsinnaangilaq” aappaagussaanut atugassiassatut. Akuersissutilli ataatsip ataatsimik nannussitaanermik periarfissii-nera ima isumaqanngilaq piniartoq pineqartoq akuersissummik ataasiinnarmik pissarsisinnaatitaasoq. Kommunalbestyrelsip namminerluinnaq aalajangersinnaavaa pisassiissutit qanoq agguartaarneqassanersut, tak. § 6, imm. 2. Kommunillu ilaanni ima pisoqarsinnaavoq pisassiissutit nannunniartussanit amerlanerusassallutik. Piffissaaq nannunniarfiusersussaaq akuersissummi naqissuserlugu takuneqarsinnaasassaaq piffissarlu taanna nannuttarineqarfiusussaalluni. Piffissaaq pineqartoq § 3 malillugu takuneqarsinnaavoq.

## § 9

*Imm. 1:*

Nannunniarnerup nalaani imaluunniit nannunniarfissamut nannunniarfimmiillu angallatigineqaqqusaanngillat timmisartut, helikopterit, qamutillu motoorillit (snescooterit ilanngullugit) kiisalu angallatit 20 BRT/15 BT sinnerlugit angitigisut. Aalajangersagaq malillugu mianeriniarneqartoq tassaa-

voq nannunniartarnerup qangaaniilli periutsit malillugit ingerlanneqaannarsinnaalluniluunniit angalatinit minnerusunit ingerlanneqartarsinnaanissaa. Taamatuttaaq aalajangersagaq pineqartoq malillugu mianeriniarneqartoq tassaavoq pinngortitami sumiiffiusut sapinngisamik annikinnerpaamik akornusersuiffiusinnaasariaqarnissaat. Aalajangersagaq matumani pineqartoq ima paasineqassaaq Inatsisartut piniarneq aallaaniarnerlu pillugit inatsisaanni nr. 12, 29. oktober 1999-imeersumi § 3, imm. 3-mi aalajangersakkamut naapertuuttut, tassani ”angallatit imakkoortit” aamma ”nunakkoortit” nassuiaasernerqarmata tassaasutut ”...immakut nunakkullu assartuutit sugaluuartulluunniit piniarnermut, aallaaniarnermut aamma aalisarnermut atorneqartut imaluunniit piniarfimmut piniarfimmiillu assartuutit atorneqartut.”

*Imm. 2:*

Aalajangersagaq ilanngunneqarpoq uumasut pisariaqanngitsumik anniartittarsinnaanerit pinngitsoortikkumallugu, tak. Uumasut illersorneqarnissaat pillugu inatsimmi § 1.

*Imm. 3:*

Nannunniarnermi qoorortoq minnerpaamik 30.06 (7,62 mm) sulloqqortussusilik kisimi atorneqaq-qusaavoq. Qoorortoq pineqartoq eqqarasuartaataanilu nutsuinnartagaasinnaassanngilaq. Piniartup illersorneqarsinnaasumik imassarineqarsinnaasussat nammineq akisussaaffigissavai. Aalajangersagaliortoqanngilarlu qoorortuuni imassarineqarsinnaasut suut atorneqartassanersut, tamatumani pineqartunik niuerutigineqartartut suli ineriartortitsiviujuarmata, siunertarineqarmallu piniartup imassat sapinngisamik naleqqunnerpaat atortassagai nannuttarisat sapinngisamik anniartinneqarsimannginngissaat isumaginarumallugu. Qoorortuut eqqarasuartaatut nutsuinnartakkalluunniit atorneqartannginnissaat pillugu piumasagaat taamaaqataatut sanilliunneqassaaq Inatsisartut piniarneq aallaaniarnerlu pillugit inatsisaanni nr. 12, 29. oktober 1999-imeersumi § 9, imm. 1-imut.

*Imm. 4:*

Qulakkeerneqassamat nannuttarisap sapinngisamik tamarmi atorneqarsinnaasarnissaa, igiinnagaqartoqassanngimmat.

## **§ 10**

*Imm. 1:*

Aalajangersakkamut atatillugu siunertarineqartoq tassaavoq nannunniartarnerup inatsisitigut illersorneqarsinnaasumik akuersissuteqartoqartinnagu ingerlanneqarsinnaaneramik nakkutilliinerup anertusinissaa. Taamatut aalajangersagaliornikkut ilutigalugu qulakkeerneqarpoq pisanik nalunaarsuisarnissap pisarnissaa, tak. § 11.

*Imm. 2:*

Akuersissummik piginnittup akuersissutimi atsiorsimanissaa nammineq akisussaaffigaa, taamatullu aamma akisussaaffigalugu assilineratigut takuneqarsinnaanissaa kommunimi oqartussaasunit nalunaarsorneqareersimanissaa.

*Imm. 3:*

Taanna imm. 1-imut sanilliullugu immikkut akuersissuteqartoqarsinnaaneramik aalajangersagaliaavoq, taamaasilluni tuniniaaneq ulluni kommunip allaffiata imaluunniit nunaqarfimmi immikkoortotap ammasarfiginngisaani pisinnaasinnaasassamat, tamanna piniartup pineqartup pisariaqartippagu. Pineqartunik nalunaarsuineq periarfissaalersorlu erngerluni pisassaaq.

*Imm. 4:*

Akuersissutip assilinerat atsiorneqarsimasoq naqissuserneqarsimasorlu tunisaqaqqinnermi tunisnermiluunniit pisisumut tunniunneqartassaaq. Tassuunakkut nannuttarisamit pissarsiat tamarnik



nannunnissimasumut aamma akuersissummut pineqartumut ujartuiffiusinnaasassammata, taamatullu unioqqutitsilluni nannunniartarnerit pinngitsoortillugit.

*Imm. 5:*

Unioqqutitsilluni nannuttarineqarsimasut pisataannik pisisinnaanerup tigusaqarsinnaanerulluunniit pillarneqaataasinnaaneratigut siunertarineqartoq tassaavoq nannut akuersissuteqaranilu unioqqutitsilluni pisarineqartarsinnaanerisa pinngitsoortinniarnissaat.

## § 11

*Imm. 1:*

Nannuttarisanik pissatanilluunniit pinerit tamaasa nalunaarutiginnittarnissaq pingaaruteqartuuvog pisassiissutaasartussat taamatullu nannuttarineqarsinnaasut piujuaannartitsinermik tunngavilimmik isumagineqarsinnaasassappata, aammalu pisat amerlassuserisartagaat tamanut saqqummiunneqartartut eqqortuusassappata. Nalunaarutit pillugit immersuiffiliat pisat nalunaarsorneqartarnerannut ilaasarput, taamatullu najukkani pineqartuni atuisinit pineqartunik aqutsisuusunut aamma uumassusilinnik misissuisunut aaqqissuussamik pisarialimmillu ingerlatitseqqiinissamut atugassaallutik.

Nannut nalunaaqutaqartinneqartut naammattoorneqarsinnaapput ilisimatusarnermi misissuineranut atatillugu taamatut ikkussivigineqarsimasut, imaappoq nalunaaqutsigaasinnaallutillu radiukkuut aalakaatitsissummik ikkussivigineqarsimasut (imaluunniit kakiorneqarsimasut). Taamaattumik nalunaaqutsersuutit il.il. pisanik nalunaarutit pillugit immersuiffilianut ilanngullugit tunniunneqartarnissaat pingaaruteqarpoq, taamaasillutik oqartussaasut misissuinernek pineqartunik ingerlatsisut taakkuninnga paasissutissarsisinnaaqullugit.

Immersuiffiliaq akuersissutip naqissuserneqarneranut peqatigitillugu tunniunneqassaaq. Akuersissummik pigisaqartup kissaatigippagu nannup pisataata ilaanik tuniniaaniarani, taamaattoq immersuiffiliaq kommunimut kinguarsarnagu tunniunneqassaaq (imaappoq piaarnerpaamik).

*Imm. 2:*

Piniartup nannuttarisami ilaanik tunisinissani orniginngippagu, kissaatigaluguli tamaat nammineq atorullugu, taamaattoq nannuttarisaq kommunimut piaarnerpaamik nalunaarutigineqassaaq ilanngussami nalunaarutinut immersuiffiliassarititaq aqutugalugu. Taasaq una: ”piaarnerpaamik” ima paasineqartariaqarpoq kommunip malinnaaffigisinnaasariaqarmagu pisassiissutigineqartunit qassit pisarineqareersimanersut, taamatullu pineqartumi nannunniarnermik unitsitsitsisinnaaqullugu pisassiissutigineqartut tamakkerneqarpata, aammalu unioqqutitsilluni nannunniartoqaqqunagu aappaagussamut pisassiissutigineqartussat ikilineqarsinnaanissaanik kinguneqarsinnaasumik, tak. § 4, imm. 3.

*Imm. 3:*

Aalajangiisuulluinnarpoq nannunniartarnerup piujuaannartitsinissaq tunngavigalugu ingerlanneqartarnissaa, taamatullu aamma nannuttat PINIARNEQ-mut nalunaarutigineqartarnissaat, tamatumani ukiumoortumik nalunaarsuusiornermut immersuiffiliat aqutugalugit. Pisat nalunaarsuusiornermut immersuiffiliat atorlugit nalunaarutigineqartarnissaannik piumasaqaat aalajangersagaavoq Namminersornerullutik Oqartussat piniarneq aallaaniarnerlu pillugit nalunaarutaanni nr. 20, 27. november 2003-meersumi § 10 aamma Namminersornerullutik Oqartussat piniarnermut allagartat pillugit nalunaarutaanni nr. 21, 28. november 2003-meersumi § 8 malillugit. Nannuttarineqartut taamaasillutik nunatsinni pisaasartunik tamanik nalunaarsueqqissaarisarnernut ilaatinneqartarput. Amerlassutsit taakkunanga pissarsiarineqartut nalunaarsuusiornermullu immersuiffilianit (ilanngussaq) paasissutissarsiat ilanngullugit nunat tamalaat akornanni pineqartut pillugit suliaqarfiusuni atorneqartarput qanoq nanoqassuseqartigineranik, qanoq piniagaatiginerannik aammalu nunami sumiiffigisaannik naleqqersuisarnermut atatillugu.

*Imm. 4:*

Nannunniarnermi arlallit peqataasimappata, taava pingaaruteqarpoq ataasiinnarmik nalunaaruteqartoqartussaaitaasoqarnissaa, taamatullu isumaginnittussamik nalunaarsuusiornermut immersuiffilianik (ilangussaq) immersuisussaasussamik. Tassunga atatillugu naapertuuttussaatinneqarpoq akuersissummik piginnittoq taannaassasoq nannuttarisaq(-sat) pillugu(-git) nalunaarutiginnissappat. Taannaassaarluni PINIARNEQ-mut nalunaarutiginnittussaq ukiumoortumik nalunaarsuiffissiatut immersuiffiliat aqutigalugit, taamaasilluni nannuttarineqartoq nalunaarsukkani arlalinngorlugu nalunaarutigineqassanngimmat.

*Imm. 5:*

Kommuninut malittarisassiissut. Pisortaqarfiup immersuiffilianik pineqartunik immersoriikkani qaammatit tamaasa tigusaqartarnissaa pisariaqarpoq, taamaasilluni piniarneq pillugu qarasaasiatigut nalunaarsuiffik ingerlaavartumik nutaanik ilaartorneqarsinnaasaqqullugu. Tassunga atatillugu piffissaliussisoqarnikuuvoq kommunit nalunaarsuusiornermut immersuiffilianik qaqugukkut Pisortaqarfimmut nassiusereersimasarnissaannik.

**§ 12**

*Imm. 1:*

Nalunaarummi siuliani atuuttumi "savaatilinnut" immikkut aalajangersakkamik atuuttoqaralarpoq, tamatumani savaatillit nannussinnaatitaagaluarmata. Aalajangersagaq taanna inatsiseqarnermut allaffik aamma politimesteri isumasioreerlugit peerneqarpoq, tamatumani nalilerneqarmat taamatut pisoqarsinnaasarnera qaqutigoorluinnartuusoq. Aalajangersagaagaluartoq pineqartoq pinerluttulernermut inatsit naapertorlugu ajornartuulernermi pisinnaatitaaneq aamma allatut ajornartumik illersuisariaqalernerq pillugit maleruagassanut tamanut atuuttumik innersuunneqarnikuuvoq, tamatumani taaneqartut atuuttussanngortillugit inuk nannumit navianartorsiortinneqalissagaluaruni nammineq illersorsinnaassammat.

Ilangullugu taaneqarpoq ajornartuulernermi pisinnaatitaaneq aamma allatut ajornartumik illersuisariaqalernerq pillugit maleruagassat tunngavigalugit nannutaq tamarmi Namminersornerullutik Oqartussanut pigisassanngortinneqassasoq, tamatumani nalornissutigineqaqqunangu nanoq pineqartoq ajornartuulernermi pisinnaatitaaneq tunngavigalugu aallaaneqarsimanersoq imaluunniit tamanna pisimanersoq tunisaqaqqinnissaq/nammineq atornissaa siunertaralugu. Naalakkersuisoq § 17, imm. 3 malillugu aalajangiisinnaavoq taamatut nannuttarineqartup ilaata Namminersornerullutik Oqartussanut pinnagu allanut tunniunneqarsinnaanissaanik, tamatumani taamatut pisoqarnissanut tunngavilersukkamik tunngavissisoqarsinnaatillugu. Qularnartoqartillugu, inuillu navianartorsiortinneqanngippata (asseersuutigalugu nannut illoqarfiit eqqaanniippata, eqqaavissuit eqqaanniippata, taamatullu qimaatinneqariaannaanngippata), taava Pisortaqarfik attavigineqartariaqarpoq, Pisortaqarfillu uumassusilinnik misissuisartut inuillu pisumut attuumassuteqartut peqatigalugit pineqartumik ajornartorsiummik aaqqiissuteqarniassaaq.

*Imm. 2:*

Taamatut nannuttoqartillugu pineqartoq nannussimasoq Pisortaqarfimmut nalunaarutiginnittussavoq. Tamanna periarfissaanngippat allat pisimasumut ilisimannittut nalunaarutiginnittussapput, tamatumani Pisortaqarfiup suliaasaq pineqartoq naliliiffigisinnaassammagu.

**§ 13**

Kommunalbestyrelse §§ 6, 7, 9 aamma 10-mi aalajangersakkat malillugit sukannernerusunik aalajangersaasinnaavoq, taamatullu kommunip iluani sumiiffinni aalajangersimasuni piniarnerup qanoq ingerlanneqarnissanut najoqqutassiorsinnaalluni. Sumiiffeqarsinnaavoq immikkut alaatsinaaffisariaqarnerusunik, assersuutigalugu sumiiffinnik piniariutsinik sukannernerusunik aaqqiussuussiviusa-

riaqartunik imaluunniik avatangiiserisat immikkut mianerisariaqarfiannik. Kommunit ileqqoreqqu-saliaat Naalakkersuisunut ilaasortamit atuuttussanngortinneqartassapput.

## § 14

### *Imm. 1:*

Nannut illersorneqarnissaat suliatigut salliutinneqartussat akornanni pingaartinneqartuummat nannunik qanorluunniit ikkaluamik nikissinnaanngilersitsineq nalunaaqutsersuinissarlunniit Naalakkersuisunut ilaasortamit akuerineqaqqaartartussaavoq. Taamaasilluni Naalakkersuisunut ilaasortaq aamma Pisortaqarfik ilisimatusarnikkut misissuinerit pillugit ingerlaavartumik ilisimatinneqartartussaapput nannut pillugit misissuinerit pineqartillugit. Aalajangersagaq malinneqartussaalersarpoq assersuutigalugu uumassusilinnik misissuisartut suliannut pineqartunut atatillugu ilisimajunnaartitsisariaqarnerit pisariaqartitsinnaasarnerat pissutigalugu, soorlu nannut biologinit aamma avatangiisiminnit sunnerneqaataat pillugit misissuiffigineqartussaattillugit. Nikissinnaanngilersitsineq aamma pisariaqalersinnaavoq nannut eqqakkat akornanni ("eqqaavissuarmit") naammattoorneqartillugit. "Nannunik eqqaavissuarmit" naammattuugaqartoqartillugu, taava Pisortaqarfik attavigineqartariaqarpoq, tassani uumassusilinnik misissuisartut isumasiorneqareernerisigut nalilerneqasammat inuit navianartorsiortinneqanngippata qanoq iliuseqartoqartariaqarneranik, tak. pinerluttulerinermut inatsit malillugu ajornartuulernermit pisinnaatitaaneq aamma allatut ajornartumik illersuisariaqalernerq pillugit maleruagassat.

### *Imm. 2:*

Nannunik nanuaqqanillunniit tigusariumallugit ungoorinissaq inerteqqutaavoq Naalakkersuisunit tamanna akuersissutigineqarsimatinnagu. Aalajangersagaq ilanngunneqarpoq Uumasut illersorneqarnissaat pillugu inatsit maleruarumallugu aammalu anguniagaammat Nunatsinni nannut piujuartitsinissaq tunngavigalugu aalaakkaasumik amerlassuseqarsinnaattillugit imaluunniit amerliartorsinnaattillugit piniarneqarsinnaasassasut.

### *Imm. 3:*

Nanuaqqat nunatsinniit anninneqarsinnaanerat tamanut atuuttumik inerteqqutigineqarpoq. "Nanuaqqat" taaneqartillugit tamanna § 2, imm. 3-mi aalajangersagaq malillugu paasineqassaaq (takukkit-taaq pineqartumut nassuiaatit). Aalajangersagaq § 2, imm. 2-mut atatillugu ingerlariaqqinneruvoq, tamatumani taaneqareermat nanuaqqat eqqissisimatitaasut. Aalajangersagaq Uumasuusivinnut atattillugu annertuumik pingaaruteqarpoq, taakuummata nanuaqqanik ungoorisinnaanissamik akuersissuteqartoqarnissaanik kissaateqarsinnaasartut.

### *Imm. 4:*

Aalajangersagaq ilanngunneqarpoq nannut sungaat Kangiani pilerigineqarluartuummata, taamatullu aarleqqutigiumanagu nannunniartoqartassasoq sungaasa tuniarneqarnissaat kisiat siunertaralugu.

## § 15

Naalakkersuisunut ilaasortaq nalunaarummi aalajangersakkat atortinneqannginnissaannik immikkut akuersisinnaatitaavoq, tamatumani ilisimatusarnermut misissuinissanut imaluunniit pisuussutit uumassusillit misissuiffiginissaannut tamanna pisariaqartinneqarpat. Aalajangersagaq paasineqassaaq Inatsisartut inatsisaanni nr. 12, 29. oktober 1999-imeersumi § 11-mi aalajangersagaq naapertorlugu. Taamatut immikkut akuersissuteqartoqartillugu, taava uumassusilinnik misissuisartut Pinngortitaleriffimmiittut tusarniaaffigineqaqqaartariaqartussaasassapput immikkut akuersissuteqartoqartinnagu pineqartoq pillugu qanoq naliliinerat pillugu paasiniaaffigalugit.

## § 16

Naalakkersuisunut ilaasortaq nannunniarnermut atatillugu malitassanik aalajangersaasinnaavoq, assersuutigalugu nannup ilaanik ilisimatuussutsikkut misissuinernut tunniussisoqartarsinnaaneranut atasumik piumasaaqatit pillugit, tamatumani ilanngullugit nannut ipiutaasartai atorlugit nannut pineqartut angutiviaanerannik arnaviaanerannilluunniit imaluunniit qanoq utoqqaassuseqarnerannik aalajangersaaniarnissamut atugassiat pillugit. Malitassat ilaatigut takuneqarsinnaasassapput akuersissummi allassimasutigut.

## § 17

### *Imm. 1:*

Aalajangersakkat taaneqareersut unioqqutinneqartillugit unioqqutitsisoq akiliisinneqarnermik pineqaatissinneqarsinnaavoq. Arsaarinnittoqarsinnaanera matumani imm. 2 malillugu aamma pisinnaavoq.

### *Imm. 2:*

Aalajangersakkami pineqartutuaq tassaavoq arsaarinnittoqarsinnaanera pisinnaasoq. Arsaarinnittoqassappat tamanna Pinerluttulerinermut inatsimmi maleruagassat malillugit pissaaq.

### *Imm. 3:*

Nannup ilaanik arsaarinnissutaasut qanoq atorneqarnissaat Naalakkersuisunut ilaasortap aalajangisavaa.

### *Imm. 4:*

Kommunini ileqqoreqqusaliat nalunaarut pineqartoq malillugu aalajangersarneqareersut maleruagassaqartinneqarsinnaapput ileqqoreqqusanik unioqqutitsineq akiliisitsinermik aamma arsaarinninermik kinguneqartussaasoq. Taamaattoqassappat tamanna ileqqoreqqusaliami maleruagassaqartinneqassaaq.

## § 18

### *Imm. 1:*

Nalunaarut atuutilerpoq ulloq 15/10 2005.

### *Imm. 2:*

Aalajangersagaq ikaarsaariarnermut atatillugu ilanngussaavoq. Inuit inuussutissarsiutigalugu piniarsinnaatitaanermik uppersaatillit akuersissummik peqanngikkaluarlutik nannunniarsinnaatitaapput ulloq 1. januar 2006 aallartinneraniit pineqartunik pisassiissuteqartalerlunilu akuersissuteqartitseriaatsimik aaqqissuussilernissap tungaanut.

Ulloq 1. januar 2006-imiit inuit nannunniarneriarunik atuuttumik inuussutissarsiutigalugu piniarsinnaanermut allagartaqassapput taamatullu aamma nannunniarsinnaanermut akuersissummik pisisa-qassallutik.

**Nannut pillugit pisassiisutegartalerlunilu akuersissutinik tunniussisoqartalernissaanut atatillugu uungaannaq najoqqutassiissut kommunit atorsinnaasaat**

*Nannunniarsinnaanissamik qinnuteqaateqartup akuersissummik pisinnaanissaanut naatsorsuutigisassanut atatillugu piunasaqaatit (§ 5)*

- Inuussutissarsiutigalugu piniarsinnaatitaanermut uppernarsaat atuuttusoq. Inatsisartut piniarneq aallaaniarnerlu pillugit inatsisaanni § 4, imm. 2 aamma Namminersornerullutik Oqartussat piniarnermut allagartat pillugit nalunaarutaat nr. 20, 27. november 2003-meersoq malillugit takuneqarsinaavoq inuussutissarsiutigalugu piniarsinnaatitaanermut uppernarsaamik qinnuteqartunut suut piunasaqaataanersut.
- Kommunimi pineqartumi inuit allattorsimaffianni nalunaarsugaasimanissaq.

Pingaarteqarput piunasaqaatit matumani taaneqartut kommunimit paasiniaarsimaneeqarsimanissaat.

*Agguataarineq (§ 6)*

Kommunalbestyrelse, qinnuteqaateqartut akuersissutitut tunniunneqartunit amerlaneruppata, agguataarineq qanoq ingerlanneqassanersoq pillugu aalajangiissaaq. Periarfissaasinnaasut ilaat makkuupput:

- Nannunniartartutoqqanut agguaassineq – takukkit ilitsersuummi § 5, imm. 2 aammalu angallanneqarlunilu assartuussisoqarneq ingiallorteqarnerlu pillugit taaneqartut.
- Tullerriiarineq malillugu aqqissuusseriaaseq, tamatumani qinnuteqaateqartut qaqugukkut akuersissummik qinnuteqarnerat malillugu nalunaarsorlugit.
- Tullerriiaanneq malillugu agguaassisarningorlugu, tamatumani ukiup siuliani pisaasimasut aammalu akuersissutit atorneqarsimangitsut naatsorsuutigalugit.
- Akuersissutinik pineqartunut tamanut agguaassineq. Nannunniarnerup pisassiissutit tamakkerneqarpata unitsinneqarnissaa kommunip akisussaaffigissavaa – taamatut pisoqarsimangippat saniatigut nannuttarineqarsimasut ukiumi tulliuuttumi pisassiissutigineqartussanik ilanngaatigineqassammata.

Kommunip akuersissutinik tunniussisarnerminut atatillugu alaatsinaanniagassai tassaapput ingerlat-siviup inatsisinut attuumassutai aqutsinermini piviusorsioortumik tunngavigisussaagamigit.

*Akuersissutinik tunniussisarneq (§ 6, imm. 3)*

Piniartoq akuersissummik pineqartumik tunineqarnerminut ilutigitillugu pisat pillugit nalunaarusi-orfissiamik tunineqassaaq (nalunaarummut ilanngussaaq).

*Akuersissutit qaqugukkut aaneqareersimanissaannut piffisaliussassaaq kommunip aalajangissavaa (§ 7)*

Nutaamik agguataarinissaaq pisinnaavoq akuersissutit pineqartut tamarmik aaneqarsimangippata. Kommune pisussaavoq innuttaasunut pineqartunik nutaamik agguataarisoqassappat qaqugukkut pinissaanik ilisimatitserneerissaminik.

*Pisassiissutigineqartut tamakkerneqareerpata (§ 6, stk. 4 og 5)*

Pisassiissutigineqartunit qassit pisinneqareersimanerat kommunip isumannaatsumik nakkutigissavaa. Pisassiissutigineqartut tamakkerneqarpata, taava nannunniarneq erngerluni unitsinneqassaaq.

- Pisassiissutigineqartut tamakkerneqarpata, tamanna Aalisarnermut Piniarnermullu Pisortaqarfimmut allakkatigut nalunaarutigineqassaaq.

*Akuersissutip tuniniaasoqartinnagu naqissuserneqartarnissaa (§ 11)*

Akuersissut naqissuserneqarsimasassaaq nannuttarisap ilaanik tuniniaasoqalersinnagu.

Kommunip allaffia imaluunniit nunaqarfimmi immikkoortorta piffissami pineqartumi ammasimangippat, taava nalunaarsuinissaq erngerluni pissaaq allaffik pineqartoq ammarpat (§ 10, imm. 3). Nannullu ilaanik tunisaqartoqanngikkaluarpalluunniit nalunaarsuusiortiffissiaq tunniunneqartussaavoq.

Akuersissutip naqissuserneqarneranut ilutigittillugu pisanik nalunaarsuiffissiaq (ilanngussaq) tunniunneqassaaq.

Peqatigiilluni nannunniarnermi nannunniataasunit ataasiinnaq taannaassaaq nalunaarsuiffissiamik (ilanngussaq 1) tunniussisussaq. Nannunniataasimasut aqqi aamma inuup normui tamarmik immersuiffiliami nalunaarsorneqassapput.

Kommunip immersuiffiliat immersoriikkat tigusani Pisortaqarfimmut qaammatit naaneri tamaasa nassiuttassavai.

Malugalugu! Naalackersuisunut ilaasortap kommunimut pineqartumut pisassiissutigineqartunik ukiumi pisassiiviusumi tullissaasunulluunniit ikilisitsisinnaavoq § 4, imm. 3 malillugu, tamatumani paasineqarpat kommunimi tassani unioqutitsilluni nannuttoqarsimasoq!

Malugalugu! Akuersissut malillugu aamma takuneqarsinnaavoq nannunniarsinnaanermut atatillugu malitassanik allanik piumasaqaateqartoqartoq, assersuutigalugu nannup pisataata ilaanik uumasunik misissuisartunut tunniussisoqarnissaanik. Kommune taamatut pisoqartussaattillugu misiliuutissanik uumasunik misissuisartut atugassaannik katersisarnissaq isumagisassarissavaa – soorluttaaq arferit annerit neqimerngannik ullumikkut tunniussisoqartartoq.

### *Kommunini ileqqoreqqusat (§ 13)*

Kommunalbestyrelse kommunini ileqqoreqqusatigut §§ 6, 7, 9 aamma 10 malillugit allatigut aalajangersaasinnaavoq, taamatullu kommunip pineqartup iluani sumiiffinni aalajangersimasuni ataa-siakkaani nannunniartarnissaq pillugu maleruagassanik malittarisassiuussisinnaalluni, tamatumani tamanna pisariaqartinneqarsimatillugu.

# NANNUSSIMANERMIK NALUNAARUT

**NALUNAARUTIGINEQARTOQ:** (krydileruk)

**Pisaq:**

**Pissataq:**

(NAQINNERIT ANGISUUT ATUKKIT)

<b>ATEQ:</b>		<b>INUTTUT NORMU:</b>	
<b>NUNAQARFIK:</b>		<b>ILLOQARFIK:</b>	
<b>AKUERSISSUTIP NORMUA:</b>			
<b>ULLOQ PISAQARFIK:</b>			
<b>SUMI PISAQARNEQ:</b> (pisaqarfiup aqqa)			
<b>SUMIISSESEQ:</b> _____ grader _____ min. allorniusaq sanimukartoq _____ grader _____ min. allorniusaq ammukartoq			
<b>PINIARIARNERMI ASSARTUUT:</b> (Angallataappat angissusia ilanngullugu)			
<b>SUIAASSUSIA:</b>		Angutiviaq: <input type="checkbox"/>	Arnaviaq: <input type="checkbox"/>
<b>UTOQQAASSUSIA:</b>		Pingasut tikillugit: <input type="checkbox"/>	Inersimasoq: <input type="checkbox"/> Utoqqaq: <input type="checkbox"/>
<b>Aallakaatitsissuteqarpa?</b>		Aap: <input type="checkbox"/> Naagga: <input type="checkbox"/>	Nr. _____
<b>Nalunaaqutaqarpa?</b>		Aap: <input type="checkbox"/> Naagga: <input type="checkbox"/>	Nr. _____
Aallakaatitsissut/nalunaaqutaq immersukkamut ilanngullugu tunniunneqassaaq.			
<b>IMMERSUISUP ATSIORNERA:</b>		<b>ULLOQ:</b>	
<b>PISAQAQATAASUT AQQI INUTTULLU NORMUI:</b>			

Piniaqatigiinnermi pisaqarneq taamaallaat nalunaaruteqartussat toqqakkamit ataatsimit nalunaarutigineqassaaq pisaqaqataasut tamarmik aqqi inuttullu normui ilanngullugit. Nalunaaruteqartussaataasup kisimi pisaq PINIARNEQ-mut nalunaarutigissavaa.

Immersugassaaq immersugaq pisaqarnerup/pissaanerup kinguninngua kommunip allaffianut nunaqarfimiluunniit immikkoortortamut tunniunneqassaaq. Immersukkat tiguneqartut kommunip qaammatit naaneri tamaasa Aalisarnermut Piniarnermullu Pisortaarfimmut nassiuttassavai.